

元代史書 四卷

元
代
史料
叢刊
初編

黃山書社

列傳第十五

新元史卷之一百十八

賜進士出身日講起居注官翰林院侍讀國史館纂修膠州柯劭忞撰

客烈亦王罕

桑昆札合敢不

乃蠻太陽罕

不月魯克抄思

別的因古出魯克

客烈亦部未詳所出或謂始居唐麓嶺北謙謙州之地後徙於土拉河相傳其祖生子七人面黝黑蒙古語黑爲喀喇故名其部爲喀喇又譌爲客烈後族類繁衍如只兒起特董鄂亦特土馬烏特薩起牙特哀里牙特皆其支派而統名爲客烈亦特言語風俗大率類蒙古其酋有默爾忽斯不亦魯罕爲塔塔兒部酋罕烏爾不亦魯黑所誘執獻於金金人釘於木驢籠之默爾忽斯之妻思復仇僞降於塔塔兒願往獻牛酒罕烏爾許之乃饋牛十羊百皮囊百皮囊不盛酒而藏壯士於內罕烏爾宴之壯士自囊中突出殺罕烏爾而返默而忽斯二子一日忽兒察忽思不亦魯黑一日古兒堪默爾忽斯

死於金忽兒察忽思嗣生八子脫幹鄰勒最長脫幹鄰勒七歲嘗爲蔑兒乞人所掠使春確忽兒察忽思贖歸十三歲又嘗同其母爲塔塔兒人所掠使收駝羊乘間逸去忽兒察忽思卒脫幹鄰勒脫幹鄰勒助金人征塔塔兒有功受王封故部眾稱爲王罕王罕性猜忌好殺以事誅其弟台帖木兒不花帖木兒又欲殺母弟額兒格喀刺額兒格喀刺奔乃蠻其叔父古爾堪舉兵逐之王罕敗遁哈喇溫山納女忽札兀兒於蔑兒乞酋脫黑脫阿假道奔於烈祖烈祖伐古爾堪古爾堪奔西夏王罕復其有部眾以是德烈祖約爲按答烈祖崩所部多叛歸泰亦兀赤太祖旣壯娶皇后孛而台新婦覲訶額倫太后以黑貂裘爲贊太祖用其贊以謁王罕於哈喇屯王罕大悅溫言撫慰許爲收集舊部未幾蔑兒乞修烈祖舊怨襲攻太祖掠孛而台而去太祖求救於王罕並約札只刺部長札木合爲應大敗蔑兒乞迎后返

或云王罕有一妃爲后之妹蔑兒乞人送后於王罕王罕乃歸之太祖焉王罕爲太祖父執太祖尊之如父至是情好益篤金遣宰相完顏襄討塔塔兒諭游收諸部出兵太祖與王罕攻殺塔塔兒部酋蔑古眞薛兀勒圖由是王罕受封於金爲夷離堇譯義王也旣而王罕弟額兒格喀刺以乃蠻兵攻王罕王罕奔西遼聞太祖強盛思歸於太祖道遠糧絕僅有五乳羊以繩勒羊口奪其乳飲之刺橐駝血爲食獨騎眇一目之馬行至客蘇孤淖爾太祖往迎之令各部分以牛羊宴王罕於圖而阿河濱遂與王罕合兵攻布而斤又合攻蔑而乞太祖分所獲於王罕王罕勢漸振再往攻蔑兒乞殺脫黑脫阿長子土古思獲其忽禿黑台察勒渾二女又降其二子忽圖赤老溫俘虜甚衆無所遺於太祖金承安四年又與太祖合攻乃蠻乃蠻不亦魯黑罕奔於謙謙州其部將可克薛兀撒卜刺黑來援戰竟日勝負未決王罕

夜薰火於原潛移其眾以去太祖不得已亦退至撒里罕哈兒之地可克薛兀撒卜刺黑追王罕遇其弟必而嘎札合敢不獲二人之妻子又入客烈亦界搭而都阿馬舍拉之地大掠王罕使其子伊而克桑昆禦之又乞援於太祖曰乃蠻掠我部衆我子能以四良將助我乎四良將者博爾朮木華黎博爾忽赤老溫也太祖遣四人赴援未至桑昆已敗其部將的斤火里赤土兒干約塔黑俱戰沒博爾朮等反敗爲勝盡奪所獲以歸王罕王罕大悅遣使告太祖曰昔也速該俺答曾救我今其子帖木真復然欲報之德惟天知之吾老矣一子伊而克孤立若令伊而克兄事帖木真是吾不啻有二子可以高枕卧矣遂會太祖於忽刺阿訥兀之地重申父子之盟矢之曰有敵同征有獸同獵毋爲讒言所間未幾蔑兒乞酋脫黑脫阿使其二弟忽敦忽而章約泰亦兀赤部長益庫兀庫楚等在沙漠中相會王罕與太祖攻

敗之事具塔而忽台傳太祖軍威大振蒙古別部皆畏懼不自安承安五年喀答斤薩而助特都爾班宏吉拉特與塔塔兒部眾會議殺一馬一牛一犬一牡羊立誓共襲太祖已而宏吉拉特部長背約遣使告於太祖太祖與王罕自庫而各湖進至不月兒湖大敗之是年冬王罕沿克魯倫河至庫塔海牙之地札合敢不與王罕部將阿勒屯阿速兒額勒忽禿兒伊兒晃火兒忽勒巴里納鄰太石等竊議曰吾兄心性無常殺戮諸弟殆盡又虐我部眾今將何以處之阿勒屯阿速兒以其言密告王罕王罕怒盡執札合敢不及諸將至帳下面詰之曰昔日相誓云何今汝曹如此吾不與校也語畢唾其面帳下人亦唾之而釋其縛阿勒屯阿速兒出語人曰吾亦與謀惟不忍於故主故告之後王罕屢責札合敢不謂汝心最叵測者札合敢不自安與額勒忽禿兒伊兒晃火兒納鄰太石奔乃蠻札木合忌太祖與王罕

并力難制至是偵知二人分兵乃會宏吉刺等十有一部盟於刊河欲襲攻太祖爲太祖所敗王罕中立不相助也旣而不亦魯黑脫黑脫阿等復合兵攻太祖太祖乞援於王罕王罕以兵來會太祖與王罕自庫而庫夷河至額喇溫赤敦山桑昆殿後行及山之隘口不亦魯黑已至見桑昆兵少謂其左右曰是可聚而殲之遣其將阿忽出及脫黑脫阿之弟爲前鋒未陣桑昆兵已踰隘不亦魯黑等從之遇風雪不能進乃退至奎騰之地士馬凍死無算札木合率所部歸於王罕是時太祖與王罕同居阿拉兒之地金泰和二年也冬太祖又移帳於阿兒怯宏哥兒之地王罕西還者額兒溫都兒折兒合不赤孩太祖欲爲朮赤聘王罕女超爾別乞王罕欲爲其孫庫世布喀聘太祖女庫勒別乞獨桑昆不欲曰吾妹至彼家北面倚戶立彼女來南面正坐可乎不許由是太祖與王罕有隙太祖怨王罕收納札木合告

王罕曰吾等如白翎雀他人乃告天雀耳蒙古稱鴻雁爲告天雀意謂白翎雀寒暑居北方鴻雁南北無常喻札木合之反覆也札木合亦與阿勒壇忽察兒合兒答乞歹額不格眞那牙勤雪格額台脫幹鄰勒合赤溫別乞等說桑昆曰帖木眞與乃蠻通舉動如此豈復可恃若不早備之且爲君父子後患阿勒壇忽察兒曰我爲君討訶額倫諸子可也額不格眞那牙勤與合兒答乞歹曰我請爲君縛其手足脫幹鄰勒曰不如先虜其部衆失衆則彼將自敗合赤溫別乞曰桑昆吾子欲何如高者山深者水吾與汝共之桑昆遣撒亦罕脫迭額以札木合等之言聞於王罕王罕曰札木合巧言寡信人也不足聽桑昆又使人說之王罕不爲動桑昆乃自見王罕曰吾父在彼猶蔑視吾如不可諱吾祖父之業彼能容吾自主乎王罕曰兒輩一家何忍相棄况彼有德於我背之不祥桑昆拂然而出王罕呼使反曰吾老矣

但思聚骸骨於一處汝乃喋喋不已好自爲之毋貽吾
憂可也桑昆遂決意殺太祖泰和三年桑昆僞爲許婚
邀太祖飲酒欲伏兵殺之蒙力克勸太祖勿往太祖從
之桑昆見事不就又欲乘太祖不備掩襲之王罕部將
也客扯闌歸語其妻阿刺黑因特且曰如有人告於帖
木眞當若何酬之有牧人乞失力克送馬渾至帳外聞
之以告同牧者巴歹二人卽夜至太祖處告變太祖移
營於寶魯特而奇特山分兵至卯溫都爾狄斯山偵敵
王罕兵至匿於紅柳林中適伊而乞歹奴牧馬見之奔
告太祖太祖在客蘭津阿而忒之地倉卒拒戰有忙古
特部將畏答兒請繞出敵後樹幟奎騰山上爲前後夾
攻之計從之將戰王罕問札木合曰帖木眞部下孰善
戰札木合曰兀魯兀特忙古特也一花纛一黑纛當者
慎之王罕曰令我只克斤把阿禿兒合答吉當之以土
棉禿別干阿赤黑失倫及幹樂董合亦特巴阿禿兒豁

里失烈門太石率護衛千人爲應最後我以中軍之上
攻之蔑不濟矣然札木合知王罕非太祖敵自引去而
陰以王罕軍事輸於太祖及戰太祖果以兀魯兀特忙
古特爲前鋒合答吉率只克斤人衝其陣不動阿赤黑
失倫以土棉禿別干兵繼進刺畏答兒墮馬兀魯兀特
將朮赤台援之阿赤黑失倫敗卻幹樂董合亦特失烈
門太石並爲兀魯兀特一軍所敗桑昆見事亟徑前搏
闖朮赤台射之中頰桑昆創甚王罕乃斂兵而退王罕
怒責桑昆阿赤黑失倫曰今日之戰忙豁侖部衆大半
從札木合暨阿勒壇忽察兒少半從帖木眞人無兼騎
去亦不遠入夜必宿林中吾往取如拾馬糞耳王罕以
子受傷不欲進兵乃退舍於只惕豁羅罕沙陀有塔兒
忽人合答安答勒都兒罕自王罕處奔於太祖以阿赤
黑失倫之言告太祖乃自答闌捏木兒吉思之地引軍
夾哈勒哈河而下營於董嘎淖爾脫爾哈火魯罕是地

水草茂美因休息士馬遣阿兒海者溫告於王罕曰我
今駐董格淖爾脫兒哈火魯罕水草皆足矣父王罕昔
汝叔古兒堪責汝謂我兄忽兒察忽思不亦魯黑罕之
位不我與而汝自據之汝又殺台帖木兒太石不花帖
木兒二弟古兒堪乃逐汝至哈刺溫哈卜察汝僅有數
人相從斯時救汝者何人乃我父也汝往哈刺不花又
往土拉壇禿朗古特後由哈卜察爾而至古蘇兒淖爾
以遇汝叔古兒堪其時古兒堪在忽爾奔塔刺速特勢
敗而遁自此入合申不復返我父奪古兒堪之國以復
於汝由是結爲按答我遂尊汝爲父此有德於汝者一
也再者父王罕汝避居於日入之地隱沒於中汝弟札
合敢不在察富古特之地我舉帽招之大聲呼之以致
彼來彼欲來而蔑兒乞迫之我遣將往援殺辟撒別乞
泰出勒則我又以汝故而殺我兄弟二人此有德於汝
者二也再者父王罕汝如雲中日影緩緩而升如火燄

緩緩而騰以來就我我不及半日而使汝得食不及一月而使汝得衣人問此何以故汝宜告之曰在木里察克速兒大掠蔑兒乞之輜重悉以與汝故不及半日而飢者飽不及一月而裸者衣此有德於汝者三也曩者蔑兒乞在不兀刺客額兒我使人往覘脫黑脫阿虛實汝知有機可乘不告於我而自進兵虜忽禿黑台哈敦察勒渾哈敦並其子忽圖赤老溫取其奧魯思而無絲毫遺我汝後與我共攻乃蠻在拜答刺黑別勒赤兒之地忽圖赤老溫率其部眾離汝而去可克薛兀撒卜刺黑遂掠汝之奧魯思我令博爾朮木華黎博兒忽赤老溫盡奪之歸以致於汝此有德於汝者四也昔者我等在哈刺河濱與忽刺安必兒答禿兀特相近之卓兒格兒痕山彼此明約如有毒牙之蛇在我二人中經過我二人必不爲所中傷必以脣舌互相剖訴未剖訴之先不可遠離今有人讒搆汝並未詢察而卽離我何也再

者父王罕我如鷲鳥自赤而古山飛越捕魚兒淖爾擒灰色足之鶴以致於汝此鶴爲誰朵兒奔塔塔兒諸人是也我又如海東青鶴越古關淖爾擒藍色足之鶴以致於汝此鶴爲誰哈答斤撒兒助特宏吉拉特諸人是也今汝乃仗彼以鷲畏我乎此有德於汝者五也父王罕汝之所以遇我者何一能如我之遇汝我爲汝子曾未嫌所得之少而更欲其多者嫌所得之惡而更欲其美者譬如車有二輪去其一則牛不能行棄車於道則車中之物將爲盜有係牛於車則牛困守於此將至餓斃強欲其行而鞭箠之徒使牛破額折項跳躍力盡而已以我二人方之我非車之一輪乎又使謂阿勒壇火察兒曰汝二人疾惡我將仍留我地上乎抑埋我地下乎我嘗告把兒壇把阿禿兒之子及辭撒別乞泰出二人幹難河地詎可無主我勸其爲主而不從我因汝火察兒爲捏坤太石之子勸汝爲主又不從汝等必以議

我我由汝等推戴故思保祖宗之土地守先世之風俗
不使廢墜我既爲主則我之心必以俘掠之營帳牛馬
男女丁口悉分於汝郊原之獸圍之以與汝山林之獸
驅之以向汝也今汝乃棄我而從王罕三河之地我祖
實與慎毋令他人居之又使告脫忽魯兒曰汝祖乃我
祖俘爲奴僕故我稱汝爲弟汝父之祖塔塔爲扯勒黑
領昆都邁乃所虜塔塔生雪也哥雪也哥生闊闊出黑
兒思安闊闊出黑兒思安生也該晃脫合兒也該晃脫
合兒生汝汝思得我之基業阿勒壇火察兒必不汝與
也在昔王罕所飲之青馬乳我起早亦得飲之汝輩
殆由是妒我我今去矣汝輩恣飲之量汝能飲幾何也
又謂阿勒壇火察兒曰汝二人今從我父王罕毋有始
無終使人議汝向日所爲皆札兀特忽里之力也今如
有人以我故而痛我將來亦必有人以汝故而痛汝縱
今歲不及汝等明冬將及汝等矣又告王罕曰請遣阿

勒屯阿速黑忽勒巴爾二人爲使或一人來昔者戰時
木華黎忙納兒失銀鞍轡黑馬請以歸我桑昆按答當
遣必勒格別乞脫端二人來或一人札木合按答哈赤
溫阿赤黑失倫阿刺不花帶阿勒壇火察兒亦各遣二
人否則遣一人使人之來可在捕魚兒渚爾遇我如我
他適則可在哈潑哈兒哈答兒罕之路尋我使者既致
各詞王罕曰彼言誠有理惟我子桑昆有以答之桑昆
曰彼稱我父爲好殺人之額不干冒我爲脫黑脫阿師
巫撒兒塔黑臣之羊銜尾而行今日不能遣使惟有一
戰我勝則併彼彼勝則併我耳卽令必勒克別乞脫端
建旗鳴鼓秣馬以待太祖旣遣使遂率部眾掠宏吉拉
特而至巴勃渚納王罕亦徙帳於喀爾特庫而格阿而
特之地有答力台幹赤斤阿勒壇者溫火察兒別乞札
木合忽勒巴里蘇克該脫忽魯兒圖海忽刺海忽都呼
特謀殺王罕事覺王罕先捕之於是答力台幹赤斤忽

勒巴里與撒哈夷特部呼眞部俱降於太祖阿勒壇者
溫火察兒別乞忽都呼特札木合奔乃蠻是年秋太祖
自巴泐渚納誓師將自幹難河以攻王罕哈里兀答兒
察兀兒罕本在哈薩兒左右太祖使往給王罕僞言哈
薩兒欲降王罕信之遣亦禿兒干盛血於牛角往與之
盟三人行至中途太祖兵亦至哈里兀答兒給亦禿兒
干下馬執獻太祖太祖付哈薩兒殺之卽日夜兼進至
徹徹兒溫都爾出不意攻之盡俘其衆王罕方卓金帳
酌馬湏高會與桑昆率數騎突圍走僅以身免行至中
途王罕曰不應與離之人我自離之今遭此厄皆我一
人之罪也至乃蠻界之捏坤烏孫爲守界將火力速八
赤騰喀沙兒所殺送其首於太陽罕桑昆亡去經亦卽
納城入波魯土伯特日剽掠以自給部人逐之逃於兀
丹乞思合兒近地曰苦先古察兒喀思每爲哈刺赤部
酋克力赤哈刺獲而殺之桑昆本以父功金人授爲本